

Pelaksanaan PKPB langkah kerajaan putuskan rantaian

Kuala Lumpur: Pelaksanaan Perintah Kawalan Pergerakan Bersyarat (PKPB) di Kuala Lumpur, Putrajaya dan Selangor dilihat sebagai langkah kompromi oleh kerajaan yang mahu melihat rantaian kes COVID-19 di putuskan dan sektor ekonomi terus bergerak.

Pakar epidemiologi dari Universiti Putra Malaysia (UPM), Dr Ahmad Zaid Fattah Azman, berkata tempoh dua minggu sepanjang PKPB ini adalah kritikal untuk melihat sama ada keputusan dibuat kerajaan ini berhasil memutuskan rantaian sebelum langkah seterusnya diam-bil.

Beliau berkata risiko peningkatan kes di Kuala Lumpur, Putrajaya dan Selangor masih ada kerana sektor ekonomi terus beroperasi, selain kewujudan kes sporadik juga boleh menyumbang ke arah itu.

“Saya berpendapat, kerajaan mengambil langkah demi langkah untuk melihat perkembangan kerana mahu meneruskan sektor ekonomi dan pada masa sama mahu memutuskan rantaian ini.

“Mungkin pelaksanaan PKPB ini usaha kerajaan untuk mengelakkan tiga kawasan berkenaan menjadi seperti di Sabah, namun risiko kes meningkat itu tetap ada kerana kes sudah berkembang kepada komuniti secara sporadik.

“Jadi tempoh seminggu dua ini membolehkan kita melihat sama ada ada kes menurun atau meningkat. Jika menurun maksudnya PKPB berhasil, namun jika tidak, tindakan selanjutnya mungkin akan dikuatkuasa-

Mungkin pelaksanaan PKPB ini usaha kerajaan untuk mengelakkan tiga kawasan ini menjadi seperti di Sabah.

Ahmad Zaid Fattah Azman,
Pakar epidemiologi
dari UPM

kan,” katanya kepada *BH*.

PKPB dikuatkuasakan di Selangor, Kuala Lumpur dan Putrajaya mulai tengah malam tadi hingga 27 Oktober ini berikutan peningkatan kes COVID-19.

Dr Ahmad Zaid, berkata kejayaan dua minggu ini bergantung kepada aspek penguatkuasaan dan peranan masyarakat dalam mematuhi prosedur operasi standard (SOP).

Beliau berkata, jika kes semakin meningkat selepas berakhirnya PKPB, kerajaan mungkin boleh mengambil tindakan seterusnya yang lebih tegas seperti melaksanakan Perintah Kawalan Pergerakan (PKP).

“Memang diberi tempoh dua minggu untuk PKPB tapi harus diingat, kemungkinan ia dinaiktaraf kepada PKP tetap ada.

“Bagi kami dalam bidang kesihatan, memang PKP adalah jalan sepatutnya untuk memutuskan rantaian tapi kami juga faham ada segelintir tidak senang dengan pelaksanaannya,” katanya.



Pengawal Keselamatan SK (2) Sultan Alam Shah, Petaling Jaya menutup pintu pagar berikutnya semua sekolah di Zon Merah ditutup bagi membendung penularan COVID-19.

(Foto Asyraf Hamzah/BH)